

Evening Dogri News

20th July 2024

1815 hrs

Headlines

- 1 संसद दे बजट इजलास कोला पैहले सरकार नै सब्बने पार्टिं दी कल इक बैठक सद्दी दी ऐ।
- 2 सेनाध्यक्ष जनरल उपेन्द्र द्विवेदी जम्मू दौर पर, सुरक्षा हालात दा लैता जायजा, उपराज्यपाल होरें आखेआ जम्मू प्रांतै च बी घाटी आला लेखा आतंकवाद दा समूलचा नाश करी दित्ता जाग।
- 3 मनोज सिन्हा होरें अज्ज हौसला टू प्वाइंट ओ ते जेके स्टार्टअप्स पोर्टल दी शुरूआत कीती।
- 4 इस म्हीने दी 26 तरीक गी शुरू होआरदिं पेरिस ओलंपिक खेड्डें च हिस्सा लैने जा'रदे 117 भारतीय एथलीटें दे दल च 29 थेआरबंद बलें दे खडारी शामिल न।



All Party Meet

सरकार नै संसद दे बजट सत्र थमां पैहले कल सांझी बैठक सद्दी ऐ। बैठक दे दरान सरकार संसद दे दौनें सदनें दे सुचारू कम्मकाज गी जकीनी बनाने लेई सब्बने बरोधी पार्टिं थमां सैहयोग दी अपील करोग। बजट सत्र संगारै शुरू होग। 23 जुलाई मंगलवारें वित्तमंत्री निर्मला सीतारमण होर लोकसभा च केन्द्रीय बजट 2024–25 पेश करोग, बजट सत्र अगले म्हीने दी 12 तरीक तगर चल्लोग। नरेन्द्र मोदी सरकार दा एह अपने त्रीए कार्जकाल दा पैहला बजट होग। पिछले म्हीने संसद नै दौनें सदनें दी सांझी बैठक गी संबोधत करदे होई राष्ट्रपति द्रौपदी मुर्मू होरें इस गल्लै पर जोर भरेआ ऐ जे एह बजट सरकार दी दूरगामी नीतिं ते भविक्ख दे नजरियै दा प्रभावी दस्तावेज होग। संसद दे बचत सत्र च सरकार गी 6 नमें बिल पेश करने दी मेद ऐ।



Army Chief

सेना प्रमुख जनरल उपेन्द्र द्विवेदी होरें अज्ज जम्मू कश्मीर केन्द्र शासत प्रदेश, टकोहदा करियै जम्मू प्रांतै दे सुरक्षा हालात दी समीक्षा कीती। अज्ज जम्मू पुज्जने पर सेनाध्यक्ष होरें पैहला पुलस मुख्यालय च इक बैठक दी अध्यक्षता करदे होई जम्मू प्रांतै च मजूदा हालात दा तफसीली जायजा लैता, टकोहदा करियै पिछले दिनें कठुआ ते डोडा जिले च होए दे आतंकी हमले दी पछोकडै च जिंदे व इक कैप्टन समेत 9 सैन्य कर्मी शहीद होई गे हे। बैठका च फौज दे सीनियर कमांडर, पुलसै दे पुलस महानिदेशक आर.आर.स्वैन हुंदे सने जम्मू कश्मीर पुलसै दे केई बड्डे अफसर ते होरने सुरक्षा अर्जेसिं दे अफसर बी मजूद हे। सेना दे फामेशन कमांडर होरें उनेंगी सुरक्षाबलें आस्सेआ कीती जा'रदिं कारवाइं बारे तफसीली जानकारी दित्ती। मगरा उनें राजभवन जम्मू च उपराज्यपाल मनोज सिन्हा हुंदे नै बी मलाटी कीती ते सुरक्षा दे बक्ख-बक्ख पैहलुं पर गल्लबात कीती। सेना प्रमुख हुंदे इस दौरे शा पैहले कल प्रधानमंत्री मोदी हुंदी अध्यक्षता च सुरक्षा बारे केबनेट कमेटी दी बैठक बी लग्गी ही।



LG-Terrorism

केन्द्र शासित प्रदेश दे जम्मू प्रांतै च आतंकवादी हिंसा च आई दी तेजी लेई पाकिस्तान गी जिम्मेदार ठैहरांदे होई उपराज्यपाल मनोज सिन्हा होरें आखेआ ऐ जे साढे सुरक्षाबल जम्मू प्रांतै च बी आतंकवाद दा उस्सै चाल्ली सफाया करी देंगन जियां उनें कश्मीर घाटी च कीता ऐ। उपराज्यपाल होरें अगगे आखेआ जे जम्मू कश्मीर च होआरदी तरक्की ते बदलाव गी दिक्खियै साढा गोआंढी मुख्य परेशान होई गेदा ऐ ते ओ जम्मू प्रांतै अंदर आतंकवाद च नमें सिरैया जान भरने लेई अपनी पूरी टिल्ल ला करदा ऐ। ओह अज्ज श्रीनगर दे अंतर्राष्ट्रीय कन्वेंशन सेंटर च हौसला टू प्वाइंट ओ ते स्टार्ट अप्स पोर्टल दी शुरूआत करदे मौके बोला करदे हे। उनें आखेआ जे जम्मू कश्मीर दे लोक रमानदारी, तरक्की, सद्भाव, भाईचारे आले माहौल च जीना पसिंद करदे न ते एह पाकिस्तान गी दिक्खी नेई सखाह करदा।



JK Startup

उपराज्यपाल मनोज सिन्हा होरें हौसला टू प्वाइंट ओ ते जेके स्टार्टअप पोर्टल दी शुरूआत करदे मौके अपने संबोधनै च सब्बने महिलां ते युवा स्टार्टअप उद्यमिणं गी शुभकामनां दित्तियां। उनें दस्सेआ जे हौसला प्रोग्राम दा बुनियादी मकसद जम्मू कश्मीर च महिलाएं च मजूद उद्यमशीलता आली छमता गी बढ़ावा देना, उंदी बजारै तोड़ी सखल्ली पुज्ज जकीनी बनाना तां जे ओ अपने उत्पाद उत्थें बेची सकन ते महिलाएं दे आर्थिक सशक्तिकरण ते विकास दी बत्त पदरी होई सकै। जम्मू कश्मीर च उद्यमता ते स्टार्टअप्स गी बढ़ावा देने दे सरकार दे धेइयै गी फही पक्का करदे होई उपराज्यपाल होरें आखेआ जे प्रधानमंत्री नरेन्द्र मोदी हुंदे मार्गदर्शन च रंभी गेदी इस मुहिम तैहत् इत्थें स्टार्टअप नीति गी पूरी तरतीब ते सलीके सिर लागू कीता जाग तां जे एहदे लाह हर उस नोजवान ते महिलाएं गी हासल होग, जिनेंगी ध्यानै च रखदे होई उंदी शुरूआत कीती गेदी ऐ।



IT Outrage

सिविल हवाबाजी मंत्रालय नै आखेआ ऐ जे सब्बने हवाई अड्डें पर विमान संचालन प्रक्रिया सामान्य तौरा पर शुरू होई गई ऐ। माईक्रोसाफ्ट च गड़बड़ी दे चलदे कल हवाई डोआरियां प्रभावत होइयां हियां। मंत्रालय नै इक ब्यान च आखेआ ऐ जे एहदे च जेड़ियां रूकावटां आइयां हियां, उनेंगी ठीक कीता जा'रदा ऐ। मंत्रालय नै इब्बी आखेआ ऐ जे सरकार हवाई अड्डें दे कम्मकाज दी लगातार निगरानी करा'रदी ऐते एयरलाइंस इब्बी जकीनी बना'रदी ऐ जे जिंदी डोआरी छुड़की गई ही, उंदे आस्तै दूई डोआरी दा बंदोबस्त कीता जाग जां फही उंदे पैहे वापस करी दित्ते जांगन। वैश्विक माईक्रोसाफ्ट च गड़बड़ी होने दे मगरा दुनिया भरै च 5 जहार शा मती डोआरियां रद्द कीतियां गेइयां हियां। भारत च मती सारी डोआरिएं च जां ते चिर लगगा हा ते किश डोआरियां रद्द कीतियां गेइयां हियां। उआं माईक्रोसाफ्ट दी सेवां बंद होने कन्नै भारतीय माली ते भुगतान प्रणाली पर मता असर नेई पेआ ऐ।



NEET

राष्ट्रीय परीक्षा अजेंसी एनटीए नै डाक्टरी दी पढ़ाई लेई दाखला मतेयान नीट-यूजी दा शैहर ते सेंटर साब्वै रिजल्ट अपनी वेबसाइट पर अपलोड करी दित्ता ऐ। एनटीए नै सुप्रीम कोर्ट दे निर्देश दे बाद एह नतीजे वेबसाइट पर चाढे न। एहदे शा पैहले अदालतै एनटीए गी मेदवारें दी पंछान दी मास्किंग करियै अज्ज दपैहरी 12 बजे तोड़ी वेबसाइट पर शैहरे-साब्वै ते मतेयान सेंटर साब्वै नतीजे घोषत करने दा निर्देश दित्ता हा। नतीजे वेबसाइट neet.ntaonline.in पर उपलब्ध न।



JPDCCL

जम्मू च बिजली दी बंड सरबंधी कंपनी जेपीडीसीएल नै बड़ी मती गर्मी दे मोसम दरान बिजली दी बघदी मंग गी पूरा करने आस्तै बाद्दू 2 जहार लक्ख यूनिट बिजली दी सप्लाई कीती ऐ। इक लिखित विज्ञप्ति च जेपीडीसीएल नै आखेआ ऐ जे तकरीबन बाद्दू खरीद थमां तकरीबन 14 जहार लक्ख यूनिट बिजली दी सप्लाई होई जेहड़ी पिछले बरे दी 12 जहार लक्ख यूनिट दी आपूर्ति दे मकाबले च 16.7-1 फीसद बद्ध ऐ।

<><><><><><>

LG-Condolence

उपराज्यपाल मनोज सिन्हा होरें जम्मू कश्मीर कला संस्कृति ते भाषा अकादमी दे सचिव भारत सिंह मन्हास हुंदी चानचक्क मौती पर सदमा बुज्जदे होई गैहरा दुख प्रगट कीता ऐ। अपने इक सौहगी सनेए च उपराज्यपाल होरें आखेआ जे भारत सिंह हुंदी बेटैमी मौत दा उनेंगी बड़ा मता दुख ऐ ते उंदा ख्या लते हमदर्दी, दुखे दी इस घड़ी च उंदे परिवार आले ते दोस्ते कन्ने ऐ। मुख् सचिव अटल डुल्लू होरें बी अकादमी दे सचिव हुंदे पूरे होई जाने पर गैहरा दुख प्रगट कीता ऐ।

<><><><><><>

Women Officer

जम्मू कश्मीर थमां अंशु जम्वाल भारतीय फौज दी हवाई सुरक्षा सरबंधी कारवाई रेजिमेंट दी कमान सांभने आली पैहली महिला अफसर बनियां न। कर्नल अंशु जम्वाल होरें ग्रैजुएशन जम्मू दे महिला सरकारी कालेज गांधीनगर थमां कीती ही। जम्मू दे राया ग्रां दी रौहने आली कर्नल अंशु जम्वाल 18 मार्च 2006 च अफसरें दी सिखलाई अकादमी चेन्नई थमां फौज च शामिल होइयां हियां। सेना दी अफसर नै MONUSCO च मिल्द्री दे निगरान दे तौरा उप्पर बी संयुक्त राष्ट्र शांति स्थापना बल कन्नै बी अपनियां सेवां दित्तियां न।

<><><><><><>

Congress Protest

जम्मू कश्मीर च विधानसभा चुनां थमां पैहले उपराज्यपाल होरें गी मते अख्तियार देने दे फैसले गी लेइयै युवा कांग्रेस नै अज्ज बीजेपी दी अगुवाई आली केन्द्र सरकार दे खलाफ विरोध प्रदर्शन कीता। बीजेपी दे खलाफ नारे लांदे होई कांग्रेस दे कार्यकर्ताएं महाराजा हरि सिंह पार्क च किटठे होइयै जम्मू कश्मीर च आतंकवादी गतिविधिएं गी बढ़ावा देने दे बरोध च इक मार्च कड्डने दी कोशश कीती। उआं उनेंगी पुलस आस्सेआ रोकी दित्ता गेआ ते किश लोके गी हिरासत च लेई लैता गेआ।

<><><><><><>

Rakhi

भारतीय डाक मैहकमे नै लोके गी सलाह दित्ती ऐ जे ओह अपने भ्राएं ते हिर्खिएं प्रेमिएं गी समें सिर रक्खड़ी पजाने लेई 31 जुलाई तगर रक्खड़ी भेजी देन। मैहकमे नै अंतर्राष्ट्रीय मेलिंग दिए कठनाइएं कन्नै निबडने ते सीमा शुल्क सरबंधी समस्याएं गी खत्म करने लेई एह सलाह जारी कीती ऐ। मैहकमे दा आखना ऐ जे रक्खड़ी आले लफाफे जां पैकेट गी सेही चाल्ली बंद कीता जा ते कन्नै पते दा पिन कोड बी पूरा ते सेही सेही लिखेआ जा। एहदे इलावा लोके गी अपना मोबाइल नंबर बी लिखी रखने लेई आखेआ गेआ ऐ। मैहकमे नै इब्बी सलाह जारी कीती ऐ जे रक्खड़ी आले लफाफे जां पैकेट च कोई बी खराब होने आली चीज, तौले अगग फगडने आली जां डुल्लने आली कोई चीज नेई रखन तां जे तुंदी रक्खड़ी सेही ढंगे सिर तुंदे प्रियजने तोड़ी पुज्जी सकै।

<><><><><><>

Paris Olympics

इस म्हीने दी 26 तरीक गी शुरू होआरदिएं पेरिस ओलंपिक्स खेड्डें च हिस्सा लैने जा'रदे 117 भारतीय एथलीटें दे दल च 24 थेआरबंद बलें दे खडारी शामिल न। इनें 24एं च नेज्जा सुट्टने दी स्पर्धा च जा'रदे सुबेदार नीरज चोपड़ा सनें 22 मर्द ते 2 महिलां एथलीट शामिल न। रक्षा मंत्रालय नै आखेआ जे ओलंपिक्स च शामिल होने जा'रदे कुसै भारतीय दल च पैहली बारी दऊं महिलां सेना कर्मी शामिल न। 2020 आले आले टोकियो ओलंपिक्स च सुन्ने दा तगमा जित्ती चुके दे नीरज चोपड़ा कोला ऐकती बड़ी मतियां मेदां न। मंत्रालय दा आखना ऐ जे 2022 च राष्ट्रमंडल खेड्डें च कैह दा तगमा जित्ती चुकी दी हवालदार जैसमीन लम्बोरिया ते 2023 च एशियाई कुश्ती प्रतियोगिता च कैह दा तगमा जित्तने आली रितिका हूडा पैहली बारी ओलंपिक्स च जा करदियां न। मंत्रालय नै आखेआ जे थेआरबंद बलें दा ओलंपिक्स च जाना इस गल्लै दा सबूत ऐ जे साढ़े बलें दी खेड्डें गी लेइयै निष्ठा पक्की ऐ।

<><><><><><>

Weather

मौसम विभाग नै जम्मू खित्ते च 26 तरीक तगर बददल गरजने दे कन्नै बड़ी मती बरखा दी पेशगोई करदे होई आखेआ ऐ जे जम्मू खित्ते च 26 जुलाई तगर ते हवा च बड़ी मती नमी होने दे कारण मौसम च बड़ा मता गुस्सा जारी रौहग। मौसम विभाग नै इब्बी आखेआ ऐ जे जम्मू खित्ते च बरखा होने दे कन्नै किश थाहरें पर भस्सियां ते कुप्पड़ बी पेई सकदे न।

<><><><><><>